

Zeitschrift: Annalas da la Societad Retorumantscha

Herausgeber: Societad Retorumantscha

Band: 96 (1983)

Artikel: Nossas societads affiliadas

Autor: Deplazes, Gion / Capaul, Giusep / Clavuot, Ottavio

DOI: <https://doi.org/10.5169/seals-234647>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 22.08.2025

ETH-Bibliothek Zürich, E-Periodica, <https://www.e-periodica.ch>

fenadur egn seminari agl cantùn, ca stat a peer an mintga gro cun oters seminaris da mussadras.

A duna Margritta, a l'equipa da surmesters a surmestras, agl secretariat da la LR segi angraztgieu da cor par la grànda ad exzelenta laver prastada a quei an egna atmosfera da colaboraziùn harmonica.

Angraztgear less jou ear a meas colegas digl cunzegl scola ad a la suprastàンza da la LR par tut quei c'els ân fatg pigl seminari da mussadras. Cun quels pleds d'angraztgamaint less jou sarar mieus davos raport digl cunzegl scola LR.

Luzi Battaglia, Trin

Nossas societads affiliadas

Società Retorumantscha (SRR)

Da temps en temps eisi forsa gest e dueivel da clamar a memoria che la Societad Retoromontscha ei la pli veglia organisaziun dils Romontschs. Ella ei era l'emprema che ha rimnau ils Romontschs da tuttas valladas sut sias alas ed ei sespruada dall'entschatta enneu da tgirar nies lungatg e nossa cultura, mo era da dar curascha da mantener nossa ierta. Con mal che nus stessen oz e per con pli paupers che nus fussen, sa mo quel sminar, che pren ina gada la peda da sfegliar els 95 toms dallas Annalas ni che vul far ina viseta agl Institut dil Dicziunari Rumantsch Grischun a Cuera.

Cul fatg e prestau digl onn che va a fin essan nus fetg cuntents.

1. Il Dicziunari Rumantsch Grischun

Da quel ein compari egl onn current treis faszichels: 93, 94 e 95 che cumpeglian ils cavazins Glin – Gon. Quei ei ina biala raccolta. Quel che

legia artechels sco GLIN (93) ni GOD (uaul, 95) sa pér far ina idea ord tgei rehas fontaunas ils artechels neschan e tgei maletg definitiv d'ina cultura alpina ch'els dattan. Nus sperein da saver continuar en quei ritmus e da terminar eifer temps previu il tom 7.

2. Las Annalas

Il tom 95, cumparius la primavera, cumpeglia bunamein 300 paginas per part illustradas en pliras colurs. El meritass in grond diember da lecturs, porta el gie zun interessants artechels ord lungatg, historia, historia culturala e litteratura, quei en differents idioms. La cronica alla fin porscha ina biala survesta sur lavur e prestaziun dallas differentas uniuns romontschas. Tgi che vul ina survesta generala dalla acziun retoromontscha, lez anfla quella negliu schi concentraru sco alla fin dallas Annalas.

3. Romanica retica

Questa retscha ha fatg in paus uonn. Denton ha nies assistent K. Widmer publicau ina lavur bibliografica «Bündnerromanisch 1977–1982» che stat en stretga relaziun culs «Studis romontschs», cumpari sco 1 e 2 dalla Romanica retica.

4. Nies institut

Pli ferm ch'il clom resuna tras nossa tiara ch'il romontsch seigi en prighel e pli fetg ch'el attira l'attenziun dils mediums da massa. Cheutras crescha era il diember da glieud che enquera da sefar in maletg dalla situaziun, quei buca mo en cerchels dalla scienzia. Adina pli e pli bia glieud da marveglias splunta a Cuera en nies institut ella via da Rohan 5 e giavischa da saver sez far in maletg dalla caussa romontscha. Da l'autra vart stattan ton nies institut sco ils redacturs adina puspei a disposiziun alla Ligia Romontscha sco a pressa, radio e televisiun cun agid e cussegl, beinsavend che tal agid pratic per nossa cultura ei da gronda pertada.

5. Damondas persunalas

Nus astgein bein allegar cun satisfacziun ch'igl ei reussiu da cattar ina buna cudria da lavur, e nus savein mo sperar che quei resti aunc ditg aschia. Scadina midada drova temps e lavur a cuost da nossa finamira generala.

Displascheivlamein ha Cla Semadeni dau sia demissiun sco commember da suprastonza. El ha fatg part da quella dapi 1960, da 1966 tochen 1975 eis el staus nies actuar. Nus vein adina appreziau siu engaschament ed engraziein ad el oz per siu cussegl e sia fideivladad.

Alla fin digl onn ha nies meriteivel vicepresident, dr. Jon Pult, abdicau sco commember da suprastonza e vicepresident. Professor Jon Pult ha fatg part da nossa suprastonza dapi 1960, naven da 1965 sco vicepresident. «Da pitschen ensü n'haja gnü tscherts lioms culla SRR tras l'attività da meis bap pel Dicziunari rumantsch grischun». Nus vein adina appreziau ses votums ponderai e positivs. Oz engraziein nus ad el per tut sia lavur e beinvuglientscha en favur da nossas miras e giavischein ad el aunc biars onns plein sulegl a Sent.

In engraziament cordial mereta nies persunal dil DRG sco era ils commembers da suprastonza e redaczion dallas Annalas.

Seregurdar en pietad vulein nus era alla fin da nies rapport da nos morts. Igl ei quei: Redactur Hendri Spescha, prof. dr. Lezza Uffer, prof. dr. Reto Bezzola, miedi Men Gaudenz e Sur Giusep Durschei. *Hendri Spescha* ei buca vivius ditg, denton fermamein engaschaus per veta e cultura romontscha, quei sco autur romontsch liric e dramatic, sco secretari dalla LR, redactur da radio e televisiun mo era sco um dalla politica culturala.

Prof. Reto Bezzola ha buca mo instruiu duront decennis la giuvente-gna academica el franzos vegl ed el romontsch, el ha era scaffiu ensemens cun prof. Tönjachen il «Dicziunari tudais-ch – ladin, ha representau nostra litteratura e cultura en differents gremiums naziunals sco la Fundaziun Schiller e suenter sia pensiun scaffiu ed ediu la gronda «Litteratura dals Rumantschs e Ladins».

La stad vargada ha era *Lezza Uffer* bandunau nus per adina. Cun el vein nus piars in Romontsch perschuadiu, schebi carschius si ella diaspora, eis el staus fideivels alla caussa romontscha, era sche buca tuts han capiu e suandau sias miras. Sco rimnader ed interpret dallas praulas ha el cattau renconuschientscha enteifer ed ordeifer nossas scheinas.

Suenter liunga malsogna ha il miedi dalla Giadina bassa *Men Gaudenz* saviu ir vi ella patria eterna, nua che tut pitir pren sia fin. Era el in perschuadiu Romontsch en plaid ed ovra, in fervent autur en nossas Annalas e valent autur dil teater, in grond carstgaun en siu pitir e supportar.

Sur *Giusep Durschei* ha oravontut ses gronds merets sco autur, e translatur, mo era regissur dil teater romontsch. Ultra da quei ha el redigiu plirs onns Il Pelegrin ed enrihiu ils Calenders cun poesias e canzuns.

Nus lein mantener quels meriteivels e lur ovra en buna memoria. Els gaudien pasch e pagaglia eterna.

Gion Deplazes

Suprastanza

President	Gion Deplazes, Cuoira
Vicepresident	Jon Pult, Cuoira
Cassiera	Genoveva Seger-Arquisch, Vaduz
Actuar	Cristian Joos, Cuoira
	Jachen Curdin Arquint, Cuoira
	Flurin Bischoff, Cuoira
	Giachen Giusep Casaulta, Cuoira
	Cristian Collenberg, Cuoira
	Flurin Darms, Domat
	Jost Falett, Samedan
	Gion Gaudenz, Puntraschigna
	Gion Arthur Manetsch, Domat
	Chasper Pult, Cuoira
	Stefan Sonder, Cuoira
	Victor Stupan, Cuoira
Revisuors da quint	Robert Capaul, Cuoira
	Chasper Stupan, Cuoira

Publicaziuns

Annalas (red. Jachen Curdin Arquint, Cuoira e Cristian Collenberg, Cuoira)

Dicziunari Rumantsch Grischun

Alexi Decurtins, Cuoira
Felix Giger, Cuoira
Hans Stricker, Cuoira

Cumischium filologica

Heinrich Schmid, prof., president, Turich
Sigfried Heinimann, prof., Berna
Konrad Huber, prof., Meilen ZH
Ricarda Liver, prof., Lützelflüh
Mena Wüthrich-Grisch, Küsnacht ZH

Romania

Igl onn 1981/82 ei buca caracterisaus dad acziuns spectacularas. La lavur per la Romontschia ei sesplegada plitost en calma. Mo era quei ei d'impurtonza, pertgei savens ein las caussas pintgas decisivas. Tuttina astgan ins dir ch'igl onn vargau seigi signaus d'ina gronda spetga. Inaga pervia dalla instanza che la Ligia Romontscha (LR) ha inoltrau alla Confederaziun per contonscher dapli mieds a pro d'acziun nova ed urgenta. Il gremi d'experts ha presentau e motivau extendidamein ils postulats en in messadi per mauns dallas instanzas federalas decidentas. En cuort cumpara il rapport. La sensibilisaziun generala per nossa caussa entscheiva a fritgar. Ina unda da simpatia per nus va tras la Helvezia. Igl interess per la Romontschia crescha. Tut che vul saver co ei stat cun nus Romontschs e nies lungatg. Quei ei bien ed endretg. Mo plaun plaunet stuessen las ovras suandar. Plidau eisi gleiti avunda. E nus lein tuttina buca cuscentar ch'ei ha gia dau enqual trumpada enteifer quella euforia. Denton: merets dat ei mo cun sperar, tener la dira ed insister.

Acziun per e cun la basa

La Romania ei ina vusch enteifer la Romontschia. Siu territori ei gronds. Quei fa siu pensum buca pli sempels. Nus manegiein cun quei oravontut il contact cun la basa, cul pievel. Persuenter sestentein nus. A quei final servan las pli biaras da nossas occurrentzas. Scadina drova buna planisaziun per reussir. En tut priu astgein nus esser cuntents dil resun. Success ha la 2. sentupada culturala a Laax giu ils 24 dad avrel 1982. Quella ei vegnida organisada ensemes cul «Cerchel Cultural da Laax». Sut la devisa: «Cultura crescha cumintonza» han ins scarpliu en ina discussiun generala, en gruppas ed el plenum ideas per realisar nova acziun romontscha els vitgs ed ellas uniuns. Igl inscunter, ch'ei ius a fin cun ina viseta agl Arcun da tradiziun (museum local) da Laax, ha gidau ad empunir novs contacts cun la basa ed enfirmiu nus ella schientscha da buca esser persuls cul quita da mantener lungatg e cultura e consequentamein nossa identitad. Suenter la Lumnezia e la Foppa ei la Cadi l'auter onn el tur cun quella purschida.

In novum ei stau la sera litterara dils 30 da zercladur 1982 a Rabius. Suenter zacons onns ha la Romania puspei ediu en atgna reschia in'ovra dil giuven scribent Silvio Camenisch, intitolada «Miez miur e miez utschi». La raschun da quella sentupada era da presentar l'ovra d'inscrivent empermettent. La caschun fuva excellenta per schar vegnir quella sera al plaid medemamein in scriptur arrivau: Ludovic Hendry. Omisdus han fatg stupent lur caussa suenter ch'els ein vegni presentai dad umens cumpetents: Silvio Camenisch da dr. Iso Camartin e Vic Hendry da dr. Felix Giger. La fetg buna presenza ed il grond interess demussau han schau percorscher che talas occurrentzas ein giavischadas e dueien vegnir cuntuadas.

Romania – Renania

La sentupada annuala dallas suprastonzas dalla Romania e Renania para da daventar plaunet tradiziun. Aschia ei quella sefatga danovamein ils 16 da december 1981 a Glion. Gl'inscunter ha surviu all'informaziun viceversa, alla planisaziun e discussiun davart acziuns da cumintonza.

Ensemes ei sefatga in'intervenziun tier la Corporaziun da vischnauncas Surselva per contonscher in meglier risguard dil romontsch entrais la

gronda corporaziun regiunala. Lezza ha rispundi che quei problem stuessi vegnir sligiaus sin plaun pli vast cun convocar inaga tut ils responsabels per las uniuns ed associaziuns regiunalas dalla Surselva. La questiun setschenti era leu. Nus vegnin a sestentar vinavon en quei grau.

Per la Renania e Romania ei dapi in temps ina cumissiun vidlunder d'edir in cudisch da canzuns per chor mischedau. Suenter ina discurrida culs umens dalla pratica ei vegniu tarmess als chors mischedai da quei intschess in questiunari cun la damonda, schebein ins dueigi edir in cudisch da canzuns u ina mappa cun fegls A4. La gronda maioritad ei s'exprimida per ina mappa cun fegls.

Plinavon realiseschan la Romania e la Renania el proxim avegnir la honoraziun da personas meriteivlas el Curtgin d'honur a Trun. Las propostas elaboradas vegnan empaladas vinavon al parsura dil comite d'undrientscha: cuss. guv. dr. Donat Cadruvi sco president dalla Fundaziun Cuort Ligia Grischa, Trun.

Ensemblamein han Renania e Romania era fatg amogna alla entschatta d'uonn en plirs vitgs dalla Surselva occurrentzas sut il tetel: «Scolaziun dils carschi» davart ils temas: Traffic, praulas, litteratura, jarvas e cant popular. Las sentupadas ein stadas frequentadas cun differenza. En tut priu hai giu in resun positiv.

Fetg legreivel ei ch'igl ei reüssiu da formar (fusiunar) dallas duas cumissiuns «Fatscha da nos vitgs», dalla Romania e dalla Renania, in sulet gremi. Quel stat sut l'egida competenta e secumprovada da Plasch Barandun, Veulden. La Romania ei representada en quei gremi tras: insch. Hubert Cavigelli, Glion; scolast Pieder Caduff, Valgronda; arch. Leo Deplazes, Sagogn e scolast Carli Scherrer, Trun. La cumissiun ei semessa da miervi all'acziun e presta lavur da vaglia.

La Romania e la Renania han era organisau quest atun a Laax in cuors per correspondenza romontscha. Quel ei vegnius tgamunaus cun distincziun dad Ignaz Cathomen, anterius president della Romania. – La collaboraziun denter la Romania e la Renania ei davera sesviluppada dètg concretamein, legreivlamein ed empermittentamein.

Romania – Romania da giuventetgna

Buca ch'ellas fussen stadas stretgas: las relaziuns denter la Romania e sia secziun: la Romania da giuventetgna. Enschiets en veva ei dètg bein. Al

parsura dalla Romania han ils giuvens e las giuvnas da nies moviment dau – suenter biars onns – ils 7 da november 1981 a Vella caschun da presentar noss’uniun cun sia intenziun ed acziun. Era il parsura e plidader dalla Romania da giuentetgna, cand. med. Gian Bundi, ei staus premuraus e s’engaschaus fetg. Igl ei stau trasatras fetg bi ed emperneivel da collaborar e contrahar cun el.

Gronds quitaus – e quei repetin nus sco mintg’onn – fa a nus la Talina, igl organ dalla Romania da giuentetgna. Ella ei sesviluppada ils davos onns ad in organ per part ideologic, polemic e persunal. La suprastonza dalla Romania ha perquei buca saviu sedecider da dar alla redacziun dalla Talina il sustegn giavischau da frs. 1000 per l’ediziun. Ella surlai quella decisiun als delegai. Nus essan sereteni da declaronzas, lessen denton punctuar cheu che nus sedistanziein en tutta fuorma dalla redacziun dalla Talina. Expressivamein lessen nus denton retener che la Talina ei in problem pervia dalla redacziun (Leo Tuor) e buca muort la Romania da giuentetgna. Leu ein ils meinis davart il cuntegn dallas davosas numeras medemamein fetg dividi.

Ediu e susteniu ovras

In camp tradiziunal ein las ediziuns. Inaga las ufficialas: Ischi semestril ed il Tschespet. Las numeras 17 e 18 digl Ischi semestril e 53 dil Tschespet (cun ovras da Mario Capaul p.m.) ein cumparidas. La Romania ha plinavon ediu l’ovra da Silvio Camenisch «Miez miur e miez utschi». Reedius – sin giavisch da pliras varts – ei era il «Vademecum», il guid linguistic per la Surselva, vegnius che fuva exaurius. Midadas da text ha ei dau neginas. Mo havein nus desistiu quella ga dils inserats e schau filmar da niev ils maletgs ch’ein per part novs.

La Romania segna sco coeditura dils quater toms cun ovras dil scribent lumnezian Aluis Arpagaus e dallas ovras da Sur Gion Cadieli. Susteniu ha la Romania las suandontas ovras: Passidas, da Vic Hendry; las ediziuns ecclesiasticas dil capitel sursilvan; Clapitsch e Pinocchio da prof. dr. Alfons Maissen; la scartira giubilara a prof. Stimm, Minca (sils 65 onns) e «175 onns Seminari da spirituals s. Glieci a Cuera» sco era l’acziun da romontschar la fatscha dil vitg da Trun.

Finanzas

Tier la reorganisaziun dalla LR ils anno 70 ha la Romania mess – e quei era lu capeivel e giustificau – peisa prioritara sin ina commensurada representaziun ella radunonza da delegai dalla LR. Deplorablamein ei vegniu dau memia pauc attenziun alla repartiziun dils mieds finanzials secund la grondezia dil territori che la Romania ha da «provientar». Quei ha giu per consequenza che nus essan pil solit adina ellas stretgas cullas finanzas. Ina correctura urgenta e sperta spetgein nus en connex cun la repartiziun dils novs mieds finanzials tras la LR.

Enderschend ch'il quen dalla LR per 1982 siari cun in avanzament da biebein 90 000 francs, ha la Romania immediat intervegniu tier la LR (via Cussegl) per ch'in cert importo da quei bene vegni surdaus supplementarmein allas quater uniuns cun tgira da territori. Nies giavisch ha cattau sustegn unanim tier la LR, denton buca tier la Regenza. Lezza ha insistiu – malgrad diversas intervenziuns – che quei avanzament seigi d'applicar per pagar giu ils deivets dalla LR. La LR metta en vesta ina summa supplementara da ca. 20 000 francs per l'entschatta dil proxim onn alla Romania (ed allas treis outras uniuns cun tgira da territori).

Impurtont ei – era psicologicamein – che las regiuns sentien ch'ei flesseggi dapli mieds finanzials alla LR. Autramein sa la Romania buca pli ademplir sias obligaziuns finanzialas. Ei dess lu mo aunc la pusseivladad dad empruar da recaltgar dapli tras las vischnauncas, cun donaziuns, ni tras prender si credits e far deivets. Lezza via sperein nus da buca stuer encaminar. Nus pretendin denton tontas finanzas ch'ei tonscha da realisar nossa acziun.

Restructuraziun dalla Romania

Ils delegai han dau avon in onn alla suprastonza l'incarica da restructurar la Romania. Quei duei daventar cun far dalla Romania ina instituziun d'acziun ed organisaziun pli efficacia culla finamira d'enragischar ella adina dapli el pievel. Ils novs mieds finanzials empermess duessen possibiliter da saver realisar quei cun dapli glieud engaschada ed era indemnizada. Perquei ei la Romania dapresent vidlunder d'elaborar in niev reglament da finanzas.

Ils 13 da mars ha la suprastanza dalla Romania elegiu ina cumissiun predeliberonta. Quella cumeglia: il parsura dalla Romania, plinavon il cancelier cantunal, dr. Fidel Caviezel e prof. Isidor Winzap. El decuors dalla stad vargada ha quella cumissiun dilucidau en pliras sesidas la vasta materia, per part dètg problematica. Ella ei seconcentrada sin quater puncts cardinals: intenziun, commembradi, relaziun Romania gronda: Romania da giuentetgna sco era da far propostas per la nova structura (organs). La cumissiun ha suttamess als delegai in rapport per informaziun e discussiun. Secund l'incarica vegn ella ad elaborar el decuors da l'auter onn in sboz per novas statutas. Quella caussa urgenta drova bia temps. Senza quella restructuraziun restassen las stentas da decentralisar (regiunalisar) il moviment romontsch vanas. La caussa fa era empau prescha. Previu ei d'eleger il secretari dalla Romania el decuors da 1983. Cun l'entschatta da 1984 duess la nova organisaziun entrar en vigur.

Dalla suprastanza

La suprastanza ha salvau el decuors digl onn vargau sis sesidas (a Cuera, Laax, Sagogn, Rabius, Vella e Glion) e deliberau in'entira retscha da tractandas. Las sentupadas ein sesplegadas en in spért da collavur ed engaschi. Ei ha tuccau a mintga suprastont da prestar – sper igl engaschi da siu ressort – aunc dabia uras per nossa incarica. Adina ei vegniu fatg tut il pusseivel per exequir il surpriu tenor meglier saver e puder. Ils 18 delegai dalla Romania alla LR han priu part dallas duas radunonzas a Cuera ed a Luven. Il parsura ha fatg part dallas radunonzas dil Cussegl dalla LR dils 23 d'avrel ed igl october 1982, sco era dils rapports orals dalla suprastanza dalla LR culs parsuras dallas quater uniuns cun tgira da territori (6-2-1982 e 15-9-1982). Plinavon ha il president era representau la Romania a caschun dalla sesida dalla Nova societat helvetica dils 21 da november 1981 a Winterthur e cooperau – cun auters – tier las emissiuns dil Radio romontsch, stadas dedicadas alla Romania (28-11-1981 e 16-1-1982).

Demissiuns

Cun uonn va la perioda d'uffeci 1979–82 a fin. Demissiunau han: la vicepresidenta, Maria Cadruvi; igl actuar Pieder Caduff e sur Marcus

Flury. Els ein stai ina perioda en uffeci. Tuts treis ein denton seddeclarai promts da segidar tier ulteriura acziun sin nies giavisch. A seretrer vegnan sco redacturs digl Ischi Semestril: bibliotecari Norbert Berther (ressort: historia locala e grischuna, tradiziuns popularas ed oravontut la cronica) sco era scol. sec. Richard Cavigelli (ressort: instrucziun ed educaziun). Remess siu uffeci ha era il redactur dil Tschespet: dr. Valentin Vincenz. Sco delegai dalla Romania alla LR giavischian da vegrir remplazzai: sur Gion Martin Pelican, Domat e Fridolin Bargetzi, Domat.

A tuts demissiunonts in cordial Dieus paghi per lur premura, bunaveglia ed engaschi demussau. Scadin dad els ha prestau lavur entira sin siu camp. Nus deplorein ch'els van, stuein denton ver capientscha per lur decisiun motivada. La suprastonza ha instradau las mesiras necessarias per occupar ils posts vacants.

Undrientschas

Ei stat en competenza dalla radunanza da delegai da nominar commembbers honoraris dalla Romania. Treis onns ein vargai dapi la davosa undrientscha. La suprastonza ei perquei dalla opinuun ch'ei seigi indicau da honorar persunas meriteivlas cun il commembradi d'honur. Ella vegn perquei a proponer uonn per quell'undrientscha: mistral Gion Giusep Derungs, Uors/Lumnezia (per sias stentas sco dirigeant e cumponist); rev. sur Giusep Durschei, Segnas (muort siu engaschi per la litteratura ed il teater) sco era il scribent Ludivic Hendry (en reconuschientscha per sia gronda prestaziun litterara).

Engraziament

La lavur e la muntada dalla Romania creschan ad in crescher. Da quei resorta ch'ei tucca ad enzatgi da s'engaschar adina dapli. Igl ei denton satisfigoint da saver constatar co tons ein promts da tonscher maun – ord ideal e perschuasiun. Autramein fuss l'incarica dalla Romania buca realisabla. Ad els eisi d'engraziar resentidamein. Inaga als consuprastonts ed al representant dalla Romania ella Ligia Romontscha. In grond engraziament meretan era ils redacturs dils organs: Tschespet ed Ischi

semestril. Plinavon era tut ils commembers dallas cumissiuns sco era nos delegai alla LR. In Dieus paghi s'auda era als revendiders da nos organs ora els vitgs, a tut quels che sustegnan, promovan e possibiliteschan acziun. Senza els fussen nos sforzs vans. Ch'els stettien fideivels e segidien vinavon. Nus essan dependents dad els e savein bien grau.

Giusep Capaul, parsura

Suprastanza

Parsura:	Giusep Capaul, Mustér
Viceparsura:	Gion T. Deplazes, Domat
Actuar:	Duri Pelican, Lumbrein
Administratur:	Giusep Decurtins, Trun
Assessurs:	Claudia Gienal, Glion e sur Alexi Manetsch, Rabius
Revisurs da quen:	Augustin Cathomen, Breil e Valentin Bearth, Glion

Publicaziuns

Tschespel	(red. Valentin Vincenz, Buchs e Guglielm Gadola, Turtig)
Ischi semestril	(red. Norbert Berther, Cuera, sr. Florentina Camartin, Turitg, Conradin Cathomas, Glion, Richard Cavigelli, Glion e Giusep Decurtins, Cuera)

Uniun dals Grischs (UdG)

A sun passos be och mais daspö cha d'he surpiglio üna plaiv chi nu porta be lavur ed onur, mo chi oblia dad esser adüna oriento da tuot que chi passa in nossa rumantschia. E quaunt chi'd es success! A nu passa ün di

cha in üna o l'otra giazetta u periodic a nu vegna scrit qualchosa sur dal rumauntsch, insè ün fat allegraivel, ma l'algrezcha pudess svelt as transformar in rasegnaziun e scha's pigliess pel pled tuot que chi vain scrit, schi nu'ns restess bod pü oter cu da der sü tuot la spraunza.

Eau am dumand adüna darcho: Perche tresour quist pessimissem? Perche vzair adüna be il negativ, discuorrer da la mort dal rumauntsch in as basand traunter oter sün cifras e statisticas da las quelas as po, scu cha tuot so, fer adöver a bainplaschair e tuot tenor sia intenziun?

Sch'eau vess gieu tels impissamaints, schi sgür cha nu vess surpigglio la plaiv da mner ün'organisaziun chi vess da chürer ün muribund! Tenor me es la situaziun dal rumauntsch bger megl dra cu avaunt var 20 u 50 ans. Pensain be a la granda simpatia chi'ns vain spüerta da noss convschins sü da la Bassa, da tuot ils gremis politics pussibels e perfin da l'ester. Scoulinas e scoula faun lur dovair, a tuocha uossa a michün da nus da fer a sieu lö tuot sieu pussibel e lura nu varo que pu lö inüngür per litanias e relaziuns apocalipticas. Na da discuorrer da la prouva da vulair mner discordia illa buna armonia da fin uossa traunter Putërs e Valladars! E perche adüna tschercher culpabels! A chi gnaro deda ün bel di la cuolpa, zieva cha'l terrain nu po uossa pü gnir vendieu als esters e cha'l turissem pera da's stabiliser? Scha mieu stimo antecessur ho zieva ses ans operusited per noss'organisaziun glivro sieu ultim rapport constatand cha nossa situaziun detta andit a pisser e pessimissem, schi prouv eau almain uossa e spraunza eir in avegnir, da la vair forsa eir cun pisser, mo cun ün schlass optimissem e que perfin scu Putèr.

La proposta per üna lingua a placativa rumauntscha, fatta da prof. dr. Heinrich Schmid da l'universited da Turich pera d'avair chatto dret bun rimbomb. Propi üna stupenda lavur chi merita noss'admiraziun e nos ingrazchamaint!

Darcho sun sortieus da stampa divers bels cudeschs chi paun gnir retrats da l'Uniun dals Grischs:

- Palingornas, da S. Bonorand
- Plür/Traditur/Diari, dad Andri Peer
- Tschantamaints d'Engiadina bassa
- Tschantamaints d'Engadin'ota

In stampa as rachattan:

- Prosa da dadour munts
- Raquints per la giuventüna

- Terms, da Victor Stupan
- Grammatica valladra/francesa, da G.P. Ganzoni

Sustegn finanziel haun survgnieu:

- A. Planta, per «Pommaraida»
- Fundaziun de Planta-Samedan pel Cuors da sted
- Scoula da paurs Lavin
- G.P. Ganzoni per la Monografia da Schlarigna

Diversas bibliotecas haun survgnieu ün bel quantum da cudeschs gratuits: Sent, Scuol, Zernez, Lavin, Scoula ind./prof. a Samedan.

D. Gisep as voul retrer dal post da redactur pel büro da plazzamaint. Eir in quist lö l'ingrazchairsa per sia laver prasteda düraunt ans. Quista laver gnaro in avegnir effettueda da nossa persuna in mez uffizi chi vess però surtuot da der regulermaing cuors d'assimilaziun in lös chi nun haun fat u nun haun pudieu fer ünguotta in merit. Scu nouv mez d'instrucziun gnaro surpiglio ed elavuro il cuors da la Fundaziun de Planta-Samedan, chi düraunt desch ans ho fat fich buns servezzans.

Sper quists puonchs essenziels fains eir nus adüna darcho ed inua mê pussibel üna tscherta cosmetica, in rumantschand inscripziuns, cudeschs da telefon etc.

La suprastanza as chatta mincha seguond mais per evader sieus dovairs e per discuter problems actuels.

In grazcher vuless in quist lö eir a l'administradura dal Chesin Manella a Schlarigna, inua cha's rechatta nossa libraria, a duonna Clara Stupan ed a sia agüdaunta, duonna Rita Clalüna. L'idea fa fabricher il Chesin Manella insembel cun la Corporaziun evangelica chi metta a disposiziun sias localiteds a la giuentüna per tuotta sorts arrandschamaints, nu pera d'esser steda güsta. A saro forsa da reponderer la chosa.

In nom da l'Uniun dals Grischs e cun que da tuot ils Rumauntschsladins am tuocha que d'ingrazcher als signuors Töna Schmid e Duri Gaudenz, redactuors da nos fich bel Chalender, a las duonnas Anita Gordon ed Annapitschna Grob pel stupend Dun da Nadal ed a la fin di eau grazcha als cuvihs, surtuot a quels activs chi's prastan di ed an per nossa chosa.

Il president:
Ottavio Clavuot

Suprastanza

Parsura:	Ottavio Clavuot, Samedan
Viceparsura:	Josef Thomas Stecher, Tarasp
Actuar:	Philipp Walther, Champfèr
Chaschier:	Valentin Pitsch, Müstair
Assesur:	Jon Depeder, Sa. Maria
Suppleantas:	Anita Gordon, Silvaplauna Ulrica Vital, Scuol

Revisuors da quint:	Reto Manatschal, Sa. Maria Göri Ganzoni, Schlarigna † Claudio Gustin, Sa. Maria
---------------------	---

Publicaziuns

Il Chalender ladin	(red. Töna Schmid, Sent e Duri Gaudenz, Scuol)
Il Dun da Nadal	(red. dna. Anita Gordon-Steinrisser, Silvaplauna, dna. Annapitschna Grob-Ganzoni, Wetzikon/ZH)

Administraziun e deposit da litteratura

Dna. Clara Stupan-Keller, Samedan

Renania

Rapport digl'onn da gestiun 1981/82

Ina constataziun che nus vein saviu far igl onn vargau: la schientscha romontscha ei el crescher. Bein ei la situazion dil romontsch sigl intschess dalla Renania tut autra che buna, denton astg'ins constatar tscheu e leu segns dad ina renaschientsha dalla schientscha romontscha. Ils pessimists han pia buca il davos plaid.

Radunanza da delegai

Ils 6 da mars ein ils delegai dalla Renania seradunai a Donat tier la radunanza generala. Suenter las tractandas statutaricas ha Sep Item referiu sur dalla reediziun della Crestomazia, Luzi Battaglia ha dau ina survesta sur dalla lavur dil seminari da mussadras LR e Florentin Lutz ha presentau il niev material dalla LR. La part ufficiala dalla radunanza da delegai ha concludiu cun in film da Johann Clopath che ha mussau impressiuns dalla Val Schons. La sera han las uniuns localas da Donat e contuorn purschiu ina sera romontscha.

Cuors

Cuors romontschs ein vegni realisai a Flem, Glion, Vuorz e Ziràun. Igl interess per cuors romontschs (cuors d'assimilaziun) ei gronds.

En collaboraziun cun la Romania ei vegniu organisau *cuors da scolazion da carschi* en pliras vischnauncas.

Temas: Rest Arpagaus, polizist cantunal ha orientau co geniturs ed educaturs san preparar lur affons per il traffic sin via. Toni Halter ha referiu davart il tema «sentupada cun las praulas romontschas» e Bernard Cathomas ha tractau problems psicologics en connex cun las praulas.

Anna Mengia Bertogg, Castrisch e Silvio Camenisch, Domat, han legiu ord lur ovras litteraras. Rita Cadruvi da Siat ha dau ina introduzion el mund dallas jarvas curativas. Giusep Decurtins e Giachen Degonda han envidau a seras da cant.

A Laax han la Renania e la Romania organisau igl atun vargau in cuors per correspondenza romontscha. Quel ei vegnius tgamunaus dad Ignaz Cathomen.

Ils cuors ein vegni frequentai differentamein, ferton ch'ins ha constatau en general en las vischnauncas pli grondas ina plitost fleivla frequen-taziun ei ina tala stada buna en las vischnauncas pli pintgas.

Grazia fetg alla cumissiun «scolaziun da carschi» sco era als referents per lur engaschi e buna laver!

Grazia fetg era alla Romania per la collaboraziun!

Periodics

Ser Jacob Michael per la part sutsilvana ed ina cumissiun consistenta da Gallus Pfister, Anna Mengia Bertogg e Luzi Battaglia per la part sursilvana han puspei procurau per l'ediziun dil *Dun da Nadal*. Era ad els in cordial engraziament per tutta laver. Sin Nadal compara mintgamai era il calender «*Per mintga gi*». Sche gie che nus vein giu laschau stampar in bien ton exemplars dapli ch'igl onn vargau ei l'ediziun dil calender stada exausta enteifer cuort temps – ina enzenna ch'igl interess per lectura romontscha ei el crescher ed in bien attestat a nos dus redacturs ser Martin Fontana e ser Jacob Michael.

La part sutsilvana dil calender ha passau ina sava che mereta ina menziun speciala. Per la trent'avla gada eis ella vegnida redegida da ser Jacob. 30 onns redactur empleneschan ina gronda cratla da laver – nus essan conscinets da quei fatg.

Cun gronda energia e perseveronza han era ils redacturs da nos *organ jamnil* «*Casa Paterna/La Punt*» Johann Clopath e ser Jacob Michael luvrau. Essend ch'els ston far tutta laver da redacziun en laver accessoria han els pauc temps liber. La Renania sa tgei ch'ella ei culponta als dus redacturs.

Cumissiun fatscha da nos vitgs

La cumissiun fatscha da nos vitgs ei vegnida fusiunada cun la cumissiun dalla Romania – in ulteriur resultat concret dalla collaboraziun denter Renania e Romania.

La nova cumissiun ha elegiu Plasch Barandun da Veulden a niev parsura. Ins ha decidiu da continuar culla lavur a Sagogn. Pils 1983 sededichescha la cumissiun alla fatscha dil vitg da Trun. La Renania ei representada en questa cumissiun entras: Plasch Barandun, Veulden, Gion Sutter, Maton, Peter Janki Luven, Jacob Pfister, Pitasch.

A tuts commembres dalla cumissiun in bien engraziament per lur bunaveglia ed engaschi.

Ediziuns

Bugen vessen nus presentau duas novas ediziuns sco prevediu el plan da lavur: Il cudisch «Jon e Din», ina translaziun dil cudisch «Max und Moritz» da Wilhelm Busch ed il glossari cun expressiuns sutsilvanas da planisaziun. Ord differents motivs ha ei dau in retard culla stampa – tochen la fin dils 1983 sperein nus da saver presentar quellas ediziuns.

Selegrar astga la Renania d'in cudisch ch' ei vegnius edius sin Nadal 1982 dalla «Fundaziun Anton Cadonau pil romontsch en baselgia». Quei cudisch che senumna «Pleivs e baselgias en valladas renanas» cuntegn monografias da prof. dr. Hercli Bertogg ed ei vegnius semtgaus per la stampa da ser Flurin Darms.

Suprastonza

La suprastonza ha salvau el decuors digl onn vargau sis sesidas e deliberau ina gronda retscha da tractandas. Essend che mintga suprastont sto prestar sia lavur per la Renania en lavur accessoria tucc'ei a mintgin da purtar grondas unfrendas.

Ei dat bia lavur era davos las culissas che sto vegnir prestada. Ils suprastonts enconuschan quella lavur.

Jeu less finir miu munglus rapport cugl engraziament a tuts che segidan adina puspei pruamein da tener il carr dalla Renania sin buna via.

Il president:
Luzi Battaglia, Trin

Suprastonza

Parsura: Luzi Battaglia, Trin
 Viceparsura: Gion Kunfermann
 Cuera-Lon
 Cassier: Gion Item, Panaduz
 Gieri Seeli, Flem
 Martin Cantieni, Donat
 Oscar Candrian, Ziràn
 Bartholome Tscharner, Ziràn
 Gieri Risch, Vuorz
 Peter Janki, Luven

Suppleants

Christ Casper Dolf, Vargistagn
 Anna Nicca-Dolf, Donat
 Margreta Jemmi-Cavigilli, Flem
 Hans Caprez, Dielsdorf
 Christian Joos, Cuera-Andeer
 Magdalena Gartmann, Castrisch
 Jacob Pfister, Pitasch
 Vreni Caprez-Spreiter, Trin
 Plasch Barandun, Veulden

Revisurs da quen:

Carl Hassler, Trimmis-Donat
 Gieri Pfister giuv., Vuorz

Administratura: (vendita da cudischs)

Barla Candrian-Janki, Cuera,
 Salvatorenstrasse 41

Publicaziuns

Casa Paterna/La Pùnt

Johann Clopath, Trin;
 ser Jacob Michael Ziràn
 ser Martin Fontana, Favugn;
 ser Jacob Michael, Ziràn
 ser Jacob Michael, Ziràn
 (part sutsilvana)
 Gallus Pfister,
 Annamengia Bertogg,
 Luzi Battaglia (part sursilvana)
 Hans Caprez, Sep Item, Gion Item,
 Flurin Caviezel, Alice Candrian

Calender PMG

Dun da Nadal

Cumissiun

Cumissiun Casa Paterna

Uniung Rumantscha da Surmeir (URS)

Rapport annual 1982

«Acziun rumantscha» è sto igl motto principal per la labour dalla suprastanza dall'URS digl onn 1982. Ancunaschaintamaintg èn igls dus davos onns stos caracterisos d'ena gronda sensibilisaziun e reclama per la Rumantscheia. Chegl è reuschia oravanttot per noss conburgeis giu la bassa. Pigl proxim avigneir ogl nom da cuntanscher la madema sensibilisaziun tigls rumantschs sez, d'igls persvader da lour identitad, er schi chegl pò tunar paradox. Deplorablamaintg è igl problem dalla Rumantscheia nia mess mengia savens an connex cugls daners. Per demussar tgi la Leia Rumantscha e sias societads affiliadas impondan betg angal lour taimp e lour forzas per discutar da finanzas – er schi chellas èn d'eminenta impurtanza per realisar mintga program da labour – ò l'URS realiso, u è vedlonder da realisar differentas acziuns specialas a favour digl rumantsch dasper sia labour tradiziunala sen camp dallas ediziuns, dalla assimilaziun digls esters, dalla scolaziun da carschias etc.

ACZIUNS RUMANTSCHAS

Rumantscher igl codesch da telefon

Scu amprema acziun ò l'URS piglia a mangs igl codesch da telefon per las vischnancas surmiranas. 25 persungas, per gronda part studentas e students digl seminari scolastic e digl seminari da mussadras dalla LR, on visito durant las vacanzas da Pasca tots abunents da telefon an Surmeir ed on rimno circa 1300 sottascripziuns da persungas tgi èn stadas prontas da midar lour indicaziuns tudestgas an rumantsch. Deplorablamaintg n'ègl betg sto pussebel alla PTT (ord muteivs da labour) da far las midadas per tottas vischnancas gio pigl codesch da telefon tgi è gist cumparia. 6 vischnancas èn neidas risguardadas, per las ulterioras duess chegl succeder pigl proxim codesch tgi cumpara an dus onns. A tottas persungas tgi èn s'angaschedas per chella tgossa ed er agls 1300 abunents tgi on do igl cumentimaint per la midada (deplorablamaintg betg tots) en cordial angraztgamaint.

Fatscha da nossas vischnancas

Essend la suprastanza dall'URS digl meini tgi la fatscha da nossas vischnancas totga sainza dubi er tar las maseiras urgentas tgi èn da piglier per tgirar noss lungatg, ò l'URS stgaffia ena cumischung tgi sa fatschainta agl avigneir da tals problems. La cumischung permanenta è sa constitueida gio la premaveira passada. Ella sa cumpona da: Gion Giatgen Steier, parsoura e digls commembers: Silvio Battaglia, Savognin, Margrit Brenn-Demarmels, Stierva, Remi Capeder, Casti e Peter Simeon, Lantsch/Vaz.

L'incumbensa principala dalla cumischung è da rumantscher la fatscha da nossas vischnancas e da rinforzar la preschientscha rumantscha tar la publicitad. Chegl duess succeder cun procurar tgi las inscripziuns, signalisaziuns, reclamas, tavlas da tot gener etc. vigan fatgas an rumantsch, ma er cun francar la preschientscha da noss rumantsch tar cumegns e privats, scu per exaimpel igls noms da products an buteias, cartas da menues an hotels ed ustareias, signets da firmas, brevs etc. Scu amprema labour on igls commembers dalla cumischung inventariso igl status quo cun nudar e fotografar las inscripziuns publicas e privatas, cun rimnar las adressas digls responsabels e cun intervigneir tigls possessours da bietgs e stabiliaints novs u da tals tgi vigan restauros. Scu proxim pass vigan igls possessours fatg attents a scretg agl giaveisch per far chellas midadas. A lunga vista ègl alloura previa d'organisar acziuns ainten las singulas vischnancas cugl motto «Igl rumantschs geidan sasez» cugl scopo da recaltger daners per finanztgier las acziuns. I sa tratta cò d'ena acziun tgi vign a cuzzar onns alla lunga. Igl success dapenda naturalmaintg er cò dalla bunaviglia e dalla prontedad digl singul d'attribueir ensatge a favour digl maletg da nossas vischnancas rumantschas.

Exposiziun davart igl rumantsch ainten igl museum Curvanera a Savognin

La Fundaziun «Museum Curvanera» a Savognin ò mess a disposiziun all'URS ena stanzetta per andrizzar ena exposiziun permanenta davart igl rumantsch. Igl scopo da chella exposiziun è da francar la preschientscha rumantscha er aint igl museum da vallada, da porscher ena informaziun

multifara a mintga visitader digl museum, ad indigens ed esters, davart igl pievel rumantsch, sies lungatg, sia litteratura, cultura ed istorgia. Gl'è previa da dar chellas informaziuns cun graficas, cartas, fotografias e texts, cun exponer codeschs rumantschs, documaints, evtl. reproducziuns etc. ma er cun metter a disposizun material d'informaziun e documentaziuns.

Scolast secundar Mario Jegher ò cumpilo l'exposiziun tgi duess neir averta agl decurs da chest anviern.

Schinavant las treis acziuns specialas ed ossa anc igl rapport dallas acziuns tgi èn gio davantadas tradiziun.

Scolaziun da carschias

Igls incumbensos dall'URS/LR per la scolaziun da carschias, Val. Bearth e Pina Iseppi, on er chest onn presto buna labour. Durant igl meis da mars ò ser Duri Loza referia dus seiras, a Tinizong ed a Casti, davart la canzung religiousa an Surmeir e scu continuaziun on els organiso pigl meis da november en referat davart la canzung populara rumantscha cun special risguard alla canzung da Sontga Margriata, cun dr. Alexi Decurtins. Pigl december ègl gio annunztgia ena seirada d'informaziun davart igl radio e la televisiung rumantscha cun dr. Stefan Sonder, dr. Clemens Pally e collaboratours da radio e tv.

Curs d'assimilaziun

En nias organisos a Savognin, Lantsch, Vaz e Lai, dont la pussebladad er agls esters dallas vischnancas vischinantas da frequentar chels curs per amprender rumantsch. Proximamaintg vign er organiso en curs a Casti. Agls scolasts tgi èn s'angascheas sen chel camp, principalmaintg Ida Baselgia, Gion Giatgen Steier, Cristian Schnöller, Luzi Jochberg e Peter Simeon, admetta en sincer paiadia.

Gruppa da teater Surses

La stad passada on differents ameis digl teater fundo ena gruppa da teater per Surses tgi ò per intent da promover ed activar igl teater rumantsch an

Surses. Ena iniziativa tgi l'URS ò benevento fermamaintg e la cala ella vign er a sustigneir – schi fò basigns – moralmaintg ed er finanzialmaintg an rom da sias pussebladads.

EDIZIUNS

Periodicas

La decisiung d'avant en pêr onns da edeir la PAGINA DA SURMEIR mintga emda è stada gista ed ò purto igls sies fretgs, chegl schibagn concernent igl andomber d'inserents scu er digls abunents. Nossa gasetta vign da preschaint derasada an circa 1300 steivas rumantschas. (Igl onn 1979 = 800 abunents). Nossa premurada redactra, donna Rina Steier-Peduzzi, marea en cordial angraztgamaint per sia buna labour. La cumischung da redacziun ò salvo agl decurs digl onn 8 sedutas.

Er las ulteriouras periodicas dall'URS, IGL NOSS SULOM, redigia da dr. Cristoffel Spinas, ed igl CALENDER SURMIRAN, redigia da scolast secundar Faust Signorell, cattan mintg'onn daples cumpraders; en segn tgi gartegia adegna puspe a noss redacters da captivar igl lectour cun interessantas contribuziuns. Agls redacters seigl angraztgea persiva.

Ulteriouras ediziuns

An collaboraziun cun la Leia Rumantscha èn er compareidas chest onn differentas publicaziuns rumantschas. All'antschatta lessa menziunar ena nova edizion digl PLED RUMANTSCH/PLAID ROMONTSCH, tgi cuntigna chest eda igls maletgs e las expressiungs correspondentas an 5 idioms da differentas professiungs tenor igl Duden illustro.

Ansemen cun la tgesa editoura Desertina, Mustér, ò l'URS realiso en codesch illustro per unfants: PIRO ED IGLS POMPIERS, pigl scalem bass, translato da Franz Capeder.

L'ovra svizzra da lectura per la giuentetna (OSL) ò er edia chest onn dus carnets surmirans: Pigl scalem superieur ò Peder Cadotsch translato en carnet litterar da Paul W. Gallico cugl tetel: L'OCA ALVA. La

cuverta scu er ena ulterioura illustraziun ò stgaffia noss pictour artist Beny Balzer dad Alvagni. Pigl scalem bass ò Ursus Baltermia translato ena labour da Suzanna Wallis cugl tetel: SOFIA ED IGL PUL-SCHAGN RICO.

Menziunar lessa er anc dus ediziuns privatas, cun las calas l'URS ò directamaintg da far navot, pero per las racumandar. Gl'èn chegl l'edi-
ziun da ser Duri Loza: RAGURDIENTSCHAS ED OBSERVA-
ZIUNS, tgi è cumpareida la stad passada e la restampaziun dalla CRE-
STOMAZIA da C. Decurtins antras la tgesa editoura Octopus a Coira;
cò lessa an special render attent agl tom 10 tgi è deditgia a Surmeir igl
qual è cumparia chest aton.

(Ena ovra litterara tgi l'URS edescha an atgna reschia: RASCHLA-
DAS E FULTSCHEIDAS, prosa surmirana da Peder Cadotsch e Gion
Peder Thöni, cun illustraziuns da Tgasper Spinas, è da preschaint an
stampa e niro a cumpareir all'antschatta digl onn vegnent).

Damaias ena bela paletta da codeschs surmirans tgi èn cumparias agl
decurs da chest onn, franc ensatge per mintga gost ed interess. Chels
codeschs pon neir retratgs digl cassier dall'Uniung Rumantscha da
Surmeir, Giatgen Schmid a Riom, u dalla Leia Rumantscha a Coira. Igl
madem vala er per

Cartas e placats rumantschs

Dasperas igls placats rumantschs e las cartas da gratulaziun e da condo-
lientscha tgi èn an vendita ò l'URS chest onn slargea la purscheida cun
cartas da Nadal e da Bumang an idiom surmiran.

Normas ortograficas

Igl onn passo vaia oriento la radunanza generala davart l'intenziun
dall'URS da refar e da cumplettar las NORMAS ORTOGRAFICAS
PER IGL RUMANTSCH DA SURMEIR da dr. Mena Wüthrich-
Grisch, tgi ans duessan dar pigl avigneir las directivas necessarias per la
scripziun digl idiom surmiran. Mena Wüthrich ò surpiglia l'incumbensa
ed ans ò preschianto en sboz correspondent. La LR ò sottamess chel ad
en ulterior filolog tgi ò fatg da sia vart propostas e do cunsegls. Da

preschaint vign igl sboz surluvro e nous speragn d'igl pudeir dar an stampa agl decurs digl onn 1983.

Conclusiung

Per concluder na lessa betg tralascher d'angraztger tgodamaintg a tots collaboratours dall'URS tgi on gido an l'egna u an l'otra maniera a realisar chest program da labour; er allas bleras persungas tgi on luvro per deir uscheia «davos las culissas». I maness cò bler mengia gliunsch da menziunar per nom mintga singul collaboratour.

En cordial paiadia a mies consuprastants ed agls delegos alla LR. La suprastanza ò salvo 10 sedutas, tiers chegl vignan anc 2 radunanzas da delegos dalla LR; ultra da chegl è igl president anc sto preschaint a 2 sedutas digl cunsegl dalla LR, ad 1 rapport oral digls presidents dallas societads affiliadas cun la suprastanza LR, ed ad 1 seduta cun la cumischung «Fatscha da nossas vischnancas».

La muntada dall'URS e la labour digls collaboratours crescha veaple. Aveir daples finanzas monta svilupar ena pi gronda activitad per pudeir investar igls daners an moda e maniera efficacia. E chegl pratenda ena gronda labour supplementara da tots collaboratours. Cun satisfacziun pudainsa constatar tgi gl'è sto pussebel anfignen ossa da cattar las persungas tgi èn prontas da metter a disposiziun lour forzas ord persasiung per en ideal. Chegl vign adegna pi grev; i duess pero rastar uscheia. Otraintg n'è l'URS betg abla d'adampleir sia incumbensa.

Per la suprastanza dall'URS
igl president
Gion Pol Simeon

Suprastanza

Parsoura:	Gion Pol Simeon, Coira
Viceparsoura:	Remi Capeder, Casti
Actuar:	Stefan Demarmels, Salouf
Cassier:	Giatgen Schmid, Riom

Assessour:
Delegos dalla Meirana:

Tona Collet, Riom
Rico Spinas, Tinizong
Lucretia Augustin, Mon

Publicaziuns

Pagina da Surmeir	(red. Rina Steier, Savognin)
Igl noss sulom	(red. Christoffel Spinas, Schwyz)
Calender surmiran	(red. Faust Signorell, Valbella)

Administraziun

Giatgen Schmid, Riom

Uniun da scriptuors rumantschs (USR)

Nossa radunanza generala ha gnü lö als 25 e 26 da settember a Razèn. Una buna vainchina da commembers s'han radunats la sonda davomezdi pro la baselgina da San Güerg per sieuer a las explicaziuns da dr. A. Peer. Davart las festivitats da la saira es gnü rapportà fingià suffiziaintamaing aint illas gasettas. Dumengia avantmezdi vaina salvà la dieta ordinaria. Eu n'ha stü constatar cha nos tröpet vain pitschen. Düront meis trienni sco parsura sun nempe 11 amis its a megl dra vita. Düront l'on scuors sun quai stats: Paul Juon, Men Gaudenz e Leza Uffer. L'USR tils ha onurats tras preschentscha a lur fossas e cun artichels in gasetta. Nus savain da predschar lur mierts per la rumantschia e tils tgnaran in zuond buna memoria, perche lur noms restan tachats vi da cultura e litteratura nossa. Plaschair m'ha fat da das-chair beneventar duos commembers nouvs in nos rauogl. Quai sun Ruth Plouda e Silvio Camenisch. Sperain ch'eir quels as chattan pro nus da chasa!

Inguan ha scumparti la Cumischiun litterara sulettamaing duns da recugnuschentscha e d'incuraschimaint, siond cha las ouvras inoltradas

nun han adempi als criteris chi legitimessan ün premi. Quist tema ha dat andit ad üna viva discussiun, causa cha'l parsura ha publichà verbalmaing il giudicat da la giuria. Ils uondrats sun: Anna Pitschna Grob-Ganzoni, Chatrina Filli, Ruth Plouda e Toni Berther. Ad els, chi's praistan adüna darcheu per nossa lingua, ün stogn e sincer ingrazchamaint.

La CL, reeletta dal 81 a Breil, as cumpuona our dals signuors C.D. Bezzola, Baseli Collenberg, Flurin Darms, Chasper Pult e G.P. Simeon. La CL as constituischa svessa.

Eir ad els grazia fichun, chi s'han miss a disposiziun per üna laver – minchatant malgratta.

La radunanza generala d'ingon es statta plünavant suot l'insaina da las tschernas. Aita Stricker sorta da la suprastanza davo s'avair prastada 36 ons a la lunga sco conscienzchusa chaschiera da l'uniun. In seis pè vain eletta Giovannina Brunold. La plazza d'actuar surpiglia Dumeni Cape-der e sco nouv parsura vain acclamà cun grond applaus ami Hendri Spescha. Displaschaivelmaing stuvaivna però til accumpagnar fingià duos mais plü tard sün sunteri da Domat. Seis mierts per l'intera rumantschia gnaran manzunats aint il prossem rapport.

Sco assessuors agradischan Irma Klainguti e G.P. Thöni, intant cha la plaiw da revisuors va ad Annamengia Bertogg e Toni Berther. La radunanza ha eir acceptà il regulativ chi circumscriva la relaziun tanter l'USR e la redacziun da la Litteratura. Theo Candinas ha orientà sur da la revisiun dals tschantamaints e scumparta a minchün ün sböz. La dieta da mai es previssa per trattar e fuormar ils nouvs statüts. Là sarà preschaint eir nos cusgliader giuridic, sar dr. Saratz. Id es dafatta gnuða fatta la proposta da scriver quels in rumantsch grischun! Da prüma vaiva eir eu l'intenziun da cumpilar quist rapport in rumantsch grischun, mo nu siond amo tuottafat sül currant, nu m'haja ris-chà.

Eir l'on scuors vaina cultivà l'amicizcha cun otras societats. Inscunters sco gio las Dolomitas, in Val Badia o a Bulzaun, sun adüna evenimaints inschmarchabels. La Lia dals artists tirolais dal süd ans invida adüna darcheu da tour part a lur sairadas. Malavita manca a nus ils pliffers per render ils invids! Culla radio e televisiun da la svizra italiana avain gnu duos jadas inscunters früttaivels.

Cun ün cordial: «A bun ans vair d'utuon in Val Müstair!»,
segna il parsura scadent

Robert Luzzi

Suprastanza

President	Hendri Spescha barmör, Domat Robert Luzzi, Lü
Actuar	Dumeni Capeder, Lucerna
Cassiera	Giovannina Brunold, Samedan
Assessuors	Irma Klainguti, Zuoz Gion Peder Thöni, Riehen
Revisuors da quint	Toni Berther, Cuoira Annamengia Bertogg, Castrisch

Publicaziuns

Litteratura, Novas litteraras (red. Clo Duri Bezzola, Ötwil a.S.,
Iso Camartin, Heidelberg
Felix Giger, Cuoira)

Cumünanza rumantscha radio e televiung (CRR)

1. Radunanza generala CRR

La radunanza generala dalla CRR ò già li igls 19 da zarladour 1982 a Coira. Las tractandas èn stadas las solitas cun anc en referat da dr. Clemens Pally partenent dumondas digl program. Scu nov commember dalla cumischung da programs an pe da prof. Gion Giusep Derungs tscherna la RG Evald Vinzens, president communal, Ruschein. Per dar

daple peisa a nossa instanza alla direcziun generala concernent igl augmaint digls programs rumantschs da radio e televisiung peggia la RG ena resoluziun. Igl premi radio e televisiun vign cumpartia a plevant ed historicher Felici Maissen, Cumbel, ed a prof. e scienzio dr. Jon Pult, Sent. La laudatio per plevant Maissen procurescha Vic Hendry, Schaffusa; chella per dr. Jon Pult preschainta dr. Jachen Curdin Arquint.

Ariguard igl ulteriour decurs dalla radunanza ranviescha agl protocol.

2. Cunsegl dalla CRR

Igl cunsegl dalla CRR, ansasez ena suprastanza amplifitgeida, ò salvo igl onn passo dus sedutas. Egna igls 6 da mars e l'otra igls 15 da zarcladour. Ainten l'amprema seduta on igls commembers da chel gremi piglia adancunter ena vasta orientaziun davart digl schef da programs dr. C. Pally, tratto igl rapport annual dalla suprastanza, igl rendachint finanzial 1981 ed igl preventiv 1983. Pianavant dat igl parsoura part, tgi la suprastanza vegia decidia da dar igl premi radio e televisiung 1982 a plevant Felici Maissen, Cumbel, ed a prof. dr. Jon Pult, Sent. Igl parsoura orientescha davart dalla nova organisaziun digl radio-telescola, davart da contacts dalla suprastanza cun igl president dall'uniung digls editours grischuns, Pius Condrau, Mustér e menziunescha igls amprems echos sen nossa instanza per en augmaint dallas emissiungs. Ord ena posiziun dalla DRS ins po concluder tgi els lessan surdar igls costs supplementars per igl augmaint digls programs rumantschs alla Confederaziun. La suprastanza dalla CRR è cunter ena tala furma da finanziaziun. Las emissiungs rumantschas totgan tar las incumbensas dalla SSR scu instituziun naziunala da radio e televisiung. Or dalla discussiung aint igl ravogl digl Cunsegl resultescha tgi er igl Cunsegl defenda la posiziun dalla suprastanza tantdapple tgi igl amprem resung ainten la pressa è sto positiv. Naturalmaintg datt'igl er vouschs criticas tgi mettan tschertas resalvas. Igl Cunsegl concluda da salvar anc ena seduta curt avant la radunanza generala per sa lascher orientar davart digl ulteriour anda-maint da chella fatschenda, essend tgi la gruppa da labour dalla direcziun generala per la deliberaziun dallas preparativas ò gia anfignen ossa nignas sedutas.

Dr. Pally orientescha davart dumondas partenent igl persunal, igl program e nossa instanza. Chella orientaziun extensiva è necessaria ord

muteiv tgi la gronda part digls commembers digl Cunsegl n'eran betg anc an possess dall'instanza. Siva tgi er igl president ò do ulteriours sclari-maints è igl Cunsegl dall'oppiniung tgi fiss da piglier an consideraziun l'erecziun d'ena quarta cadagna UKW ainten igl Grischun per las emissiungs rumantschas.

Igl Cunsegl accepta cun pitschnas midadas igl rapport annual, igl rendachint finanzial cun la DRS ed igl rendachint intern dalla societad scu er igls preventivs cun la DRS resp. igl chint intern dalla CRR per igl onn 1983.

Sot varia vign davart d'en commember digl Cunsegl crititgia ena emissiung «CH-Magazin». El protesta cunter en tal sa deportar d'en journalist. Chella emissiung na partotga betg igl program rumantsch da maniera tgi nous vagn er betg da piglier posizion lotiers.

La sagonda seduta digl Cunsegl ò gia li igls 15 da zarcladour 1982. Igl tractandum principal è sto l'orientaziun e la discussiung an connex cun nossa instanza concernent igl augmaint dallas emissiungs rumantschas. Tant igl schef da program dr. C. Pally, scu er igl president dalla CRR tgi fon part dalla gruppa da labour dalla direcziun generala tgi ò da preparar propostas per mangs dalla direcziun generala, resp. digl comité central, dattan ena detagleda orientaziun sur digl passo anfignen ossa an chel risguard. Cun la ORG ò la suprastanza dalla CRR catto en consens per ena sliaziun transitorica anfignen tgi la 4 cadagna da radio ainten igl Grischun è construeida. Siva lunga discussiung concluda igl cunsegl da star tar la proposta dalla suprastanza e da sottametter alla radunanza generala ena resoluziun per approbaziun.

Scu nov commember dalla cumischung da programs propona igl Cunsegl alla radunanza generala, president communal Evald Vinzens, Ruschein. Sot varia exprima Jon Gottschalk sia disillusioung persunala e chella dalla populaziun, ariguard ena emissiung davart «Igl avegnir dil romontsch» derasada avant en taimp tras la televisiun DRS. Tala emissiung vegia ignoro cumpllettamaintg igls problems digl lungatg rumantsch e mess aint igl center problems da nateira politica. Giovannina Brunold e Gion Crest Demarmels affimeschan la giudicatura concernent chella emissiung. Els èn dall'oppiniung tgi an tals cass duess la regiung reager immediatamaintg.

3. Suprastanza

La suprastanza dalla CRR ò salvo igl onn 1982 19 sedutas. La cumischung dalla suprastanza tgi n'è betg en organ statutaric ò an diversas sedutas preparo las tractandas per la suprastanza.

Igl problems principals tgi la suprastanza ò stuia deliberar resp. piglier posiziun èn igls sequents:

a) Augmaint dallas emissiungs rumantschas da radio e televisiung
Chel tractandum figurava quasi sen la glista da tractandas da mintg' otra seduta seigl dalla suprastanza u dalla cumischung. La suprastanza sa lascheva orientar mintgamai davart digl president e digl schef da programs tgi faschevan part dalla gruppa da labour dalla direcziun generala, per preparar las propostas a mang digl comité central. Chel problem ò pratandia blera labour fadigiousa specialmaintg er ariquidigl igl proceder tactic tenor la situaziun actuala scu ella sa preschiantava. Igl resultat final n'è betg sto digl tot cuntantivel, ma an vista alla situaziun momentana dalla SSR acceptabel.

Scu ischas gio nias infirmos ainten la pressa e tras radio e televisiung ò igl comité central piglia igl suandard conclus:

Radio:

- davent digl 1. da schaner 1984 vignan mintgade derasadas ca. durant 3 ouras emissiungs rumantschas da radio;
- per igls indrezs e las installaziuns tecnicas vignan concedias credits da frs. 565 000.— ;
- igls costs per tschains, amortisaziuns, locaziuns e producziun da programs an import da frs. 800 000.— vignan per igl onn 1984 mess a disposiziun or digl credit da radio digl directer general per igls onns 1983 ed 1984;
- davent digl onn 1985 duess la soluziun pigureida tenor igls meds finanzials tgi stattan a disposiziun neir consolidada ed amplifitgeida an senn dall'instanza dalla CRR.

Televisiung:

- davent digl 1. november 1984 vign igl taimp d'emissiung per igl Telesguard amplifitgia a 15 minutas ad emda;
 - la realisaziun da provas da off-commentars rumantschs tar emissiungs directas segl canal dalla Svizra franzosa vign concedeida.
- La finanziaziun da frs. 50 000.— davainta per 1984 er cun meds finanzials dalla direcziun generala;
- siva digl 1. schaner 1986 duess la preschientscha digl lungatg rumantsch aint igl program da televisiung neir slargedaa tenor igls meds finanzials tgi stattan a disposiziun.

Localitads:

- L'examinaziun concernent compra u locaziun d'ulteriouras localitads agl li digl post da programs a Coira vign prosegueida anavant.

An ena communicaziun speciala an senn d'en commentar tar igl conclus digl comité central conferma la direcziun generala tgi las expensas per la scolaziun da 6 novs collaboratours stabels, tgi èn pero per dantant betg aint igl contract collectiv da labour, croda a carica dalla SSR, vot deir na tangescha betg igl import da frs. 800 000.— concedia per igl program etc. Chel import cò monta a frs. 150 000.—. Ainten las considerandas digl conclus digl comité central rancanoscha chella instanza tant igl dretg scu er la necessitat d'en slargiamaint dallas emissiungs rumantschas da radio e televisiung per igl mantignamaint e la tgira da lungatg e cultura rumantscha. An tot piglia pudainsa esser cuntaints cun igl resultat contanschia er schi el na corresponsa betg agls noss postulats. An prancepi vignan noss postulats affirmos. La realisaziun da chels vign pero a succeder an etappas. Da gronda impurtanza è la dumonda dallas finanzas.

b) Contacts:

- Sen giavisch dalla uniung Grischuna d'editours ò la suprastanza conferia cun igl president da chella uniung, Pius Condrau. I sa tratta an amprema lengia da dumondas partenent igl radio local. L'uniung d'editours Grischuna è neida recipeida scu commember dalla CRR;
- igls 14 da favrer 1982 ò gia li a Turitg ena dieta organisada dalla

- direcziun regiunala DRS partenent dumondas da radio local. La CRR è stada represchanta cun 2 commembers dalla suprastanza;
- igl president dalla CRR è sto convoco ad ena discussiung cun 2 represchantants digl Uffeci federal da cultura an connex cun l'elaboraziun d'en rapport d'experts partenent la situaziun culturala, linguistica, economica etc. digl Grischun rumantsch e digl Grischun taliang. Scu saro gio ancunaschaint, racumonda chella grappa da labour an sies rapport final ferm l'impurtanza d'en slargiamaint dallas emissiungs rumantschas da radio e televisiung an interess digl mantignimaint da lungatg e cultura rumantscha;
 - igl noss commember da suprastanza dr. Peider Ratti ò piglia part alla radunanza generala dalla Ladina digls vigls a Zernez. Lo è tranter oter nia postulo tgi an vista ad en'amplificaziun digl program rumantsch da radio e televisiung duessan igls collaboratours neir repartias agl manc per part ainten las regiungs rumantschas e cotras intensivar igl contact direct cun noss pievel;
 - an ples conferenzas ò igl president dalla CRR mantignia igl contact cun igl responsabel per radio e televisiung dalla direcziun da telefon a Coira, Urs Hofer. Chels contacts èn impurtants arigaurd igl svilup della tecnica;
 - la suprastanza ò salvo 2 sedutas cun ena delegaziun dalla suprastanza dalla ORG. An amprema lengia sa trattavogl da cattar ena sliaziun cuntantevla partenent igl slargiamaint digl noss program da radio, tgi vign emess sen canal DRS 2 ainten igl Grischun da maniera tgi durant chel taimp son igls Grischuns tudestgs betg tadlar igl program DRS 2. Nous ischan rivos cun la delegaziun dalla ORG tar en consens pero duess chella sliaziun esser angal transitorica anfignen tgi ena quarta cadagna da radio ainten igl Grischun per las emissiuns rumantschas è construeida. Anfignen chel termin na duess igl program rumantsch er betg surpassar 4 ouras. An connex cun chel problem è er sto da confereir cun la delegaziun dalla ORG arigaurd igl plan da structura 1984. Er lo vainsa catto ena sliaziun cuntantevla. Tant davart dalla ORG scu er dalla CRR è nia exprimia igl giavisch d'intensivar igl contact tranter las 2 societads an vista a divers interess communabels;
 - vers la fegn digl onn on suprastanza e schef da programs sa conferia cun directer A. Blum digl program radio dalla DRS partenent igl plan da structura 1984. La sliaziun proponeida da directer Blum na cun-

tainta nous betg digl tot principalmaintg ariguard l'oura per la derasaziun dallas novitads;

- scu usito ò igl president dalla CRR piglia er chest onn part alla seduta digls presidents dallas societads commembras dalla DRS. Co vignan discussiundas dumondas da qualunqua nateira tgi pertotgan las societads commembras e la relaziun cun la DRS. Per igl futur ègl da preveir tgi tar talas conferenzas seian er preschaints igls delegos dallas singulas societads commembras ainten la suprastanza regiunala;
- igls 20 d'october 1982 ò gia li a Comano ena radunanza dalla delegaziun digls deputos agl Cussegl grond dallas vals taliangas digl noss cantung cun la suprastanza dalla CORSI ed igls directers e schefs da partizun da radio e televisiung dalla Svizra talianga. Igl president dalla CRR ed igl president dalla Pro Grigioni Italiano èn er stos preschaints. Igl contact cun igls noss confederos neolategns dalla Svizra talianga è fitg impurtant e da punct da vista practic er nizevel;
- scu usito gio d'onns annò on delegos dalla suprastanza CRR frequento las radunanzas generalas dallas otras societads commembras dalla DRS. Er co sa trattogl da mantigneir ed intensivar igl contact cun chella gliout tgi ò an muments decisivs da piglier posiziun an dumondas tgi pertotgan igls noss interess.

c) *Tschernas*

Tenor igl statut special dalla CRR, approbo digl comité central, ed igls statuts dalla CRR sezza, eligia e relascha ella igl schef da program ed igls capos da ressort radio e televisiung etc., fo propostas per l'elecziun digls ulteriours collaboratours e collaboratouras digl post da programs per mangs digl directer regiunal tgi stò an amprema lengia risguardar las propostas dalla suprastanza CRR. La CRR defenda ansomma igls interess dalla populaziun rumantscha aintan ed ordvart igl cantung Grischun. A fundamaint da chellas determinaziuns legalas ò la suprastanza collaboro ansemens cun igl schef da programs ed igls capos da ressort tv tar las preparativas per la tscherna da 2 redacters per la televisiung rumantscha. Tottas 2 gedas stava a disposiziun en stupent domber da candidats. Cun la gronda part da chels on la suprastanza ansemens cun igl schef digl post ed igl capo da resort mano discussiungs da ca. 45 min., oravantot pertutgond la mutivaziun per l'interessenza, la scolaziun e la practica, igl lungatg rumantsch, ancunaschientschas specialas, angaschamaint etc. Intent da chella discussiung è d'obtigneir ena impressiung generala digl

singul candidat. An tots dus cass òn suprastanza e schef da program catto en consens partenent la proposta alla direcziun regiunala. Scu savez èn nias tscharnias: Elmar Deflorin da Mustér e Gion Pol Simeon da Lantsch. Per la successiung da darscheder cantunal Not Carl ainten la cumischung da programs dalla DRS ò la suprastanza proponia dr. Chasper Buchli, Zernez, zoolog, tgi è gio commember dalla cumischung da programs CRR. Er igl dretg da far da chellas propostas sa basa segl statut special e sen igls statuts dalla CRR.

d) Plans da structura

A fundamaint digl art. 6 digls statuts dalla CRR concluda la CRR (suprastanza) davart igls plans da structura per mangs dalla suprastanza regiunala sen fundamaint digls documaints da decisiung elaboros dalla direcziun regiunala. Chest onn è la deliberaziun da chel problem stada pi cumplitgeida an vista agl slargiamaint digl program digl radio rumantsch digl onn 1984. Suprastanza e schef da program on catto ena sliaziun tgi e per buna part neida acceptada dallas instanzas dalla regiung.

e) Procedura da consultaziun partenent radios locals

La CRR ò stuia piglier posizion davart dumondas relativas dalla regenza Grischuna, dalla suprastanza regiunala DRS e dalla direcziun generala an connex cun 4 dumondas per concessiung ord igl intschess rumantsch resp. liguisticamaintg masdo digl noss cantung. An prancepi è la CRR betg cunter radios locals tant daple schi chels mettan an vista er ena derasaziun d'emissiungs rumantschas. Ma i vign a dar difficultads segl sectour dalla tecnica. Per dantant ègl previa d'emetter las emissiungs rumantschas sen canal DRS 2, ma scu gio menziuno ainten en oter li sa trattigl cò angal d'en stadium transitoric. A mez term sto neir erigia ena quarta cadagna da program per las emissiungs rumantschas. *Chella cadagna duess aveir prioritad per emissiuns rumantschas e betg neir occupada da radio locals.* Supra da chegl preveian igls petents per radios locals ena derasaziun d'emissiungs rumantschas angal aint igl idiom local. La tendenza generala dallas emissiungs rumantschas duess pero esser an senn d'ena avischinaziun ena tala d'integrazion e betg da desintegrazion. Er sot chel aspect na son radios locals betg aveir la preferentscha an concurrenza cun emissiungs dalla CRR.

f) *Piglida da posiziun ariguard igl occupar igl post digl directer regiunal*
Sen dumonda digl noss delego ainten la suprastanza regiunala ò la suprastanza CRR er discussiuno chel problem. Ella vign alla conclusiung tgi an prancepi seigl betg da dessister d'occupar chel post. Gist per igls noss interess seigl impurtant d'aveir *ena persunga alla testa dall'instituziun professiunala* dalla regiung. La sliaziun preveida duess perchegl esser angal transitorica.

g) *Cristiàn Joos, nov president dalla cumischung radio-telescola*, ò do aint igl ravogl dalla suprastanza detagleas sclarimaints partenent igl nov andamaint sen chel sectour d'emissiungs. La nova cumischung crei da cuntanscher daple efficienza cun la publicaziun digl carnet radioscola. An tottacass prevei el da saveir star ariguard las expensas aint igl rom digl preventiv.

h) An vista alla *successiun da dr. C. Pally scu schef digl post da programs* ò la suprastanza an consentimaint cun dr. Pally e directer Blum gio fixo la procedura per chella impurtanta fatschenda. La tscherna tgi croda an cumpatenza digl Cunsegl è preveida schi gl'è ensacu pussebel gio avant las vacanzas da stad 1983.

i) Scu mintg'onn ò la suprastanza preparo *las tractandas per la radunanza generala* scu igl rapport annual, igl rendachint, igl preventiv etc. Ella ò er sa laschea orientar davart digl schef da programs partenent igl rendachint e preventiv digl post da programs. Chella incumbensa è statueida ainten igls statuts dalla CRR.

4. Cumischungs

Concernent la labour dallas cumischungs radio-telescola e la cumischung da programs ranviescha agls rapports specials da chels gremis.

La cumischung ecclesiastica ò salvo igl onn passo 3 sedutas. Dasperas igl urden digls predas on igls commembers da chel gremi er tschartgea otras alternativas per emissiungs religiousas. Da punct da vista ecumenic è la collaboraziun ainten chella cumischung optimala.

La cumischung per la labour publica ò salvo 3 sedutas e dasperas organiso treis seiras d'infurmazion: a Sent, Sumvitg e Casti. Dantant tgi

las occurencias a Sent e Sumvitg èn stadas fitg bagn frequentadas è la participaziun a Casti stada andanta. La discussiung è stada dapertot fitg veiva ed interessanta. La populaziun apprezziescha talas seiradas e la societad purtadra dalla SRR tant scu l'instituziun da program on tot interess da popularisar lour instituziuns e cotras render attent igl pievel all'impurtanza e l'effizienza da nossa societad naziunala da radio e televiising. Per igl onn current ègl puspe previa d'organisar 3 seiradas an chella furma. Igl film davart dalla CRR ed igl post da programs renda l'infuriazion pi interessanta.

Per la suprastanza
igl president:
Stefan Sonder

Suprastanza

Parsoura: Stefan Sonder, Cuira

Viceparsoura: Willi Dolf, Cuira
Fidel Caviezel, Cuira
Christian Fonzun, Cuira
Peider Ratti, Cuira